

9. oktober 2013

UKA 2013/124
Nikolaj Jeremiassen

Imartani Kalaallit Nunaata aalisarnikkut oqartussaaffigisaani raajarniarneq pillugu Namminersornerullutik Oqartussat nalunaarutaata nr. 23, 29. august 2002-imeersup allangortinneqarnissaanut Naalakkersuisut peqquneqarnissaannik Inatsisartut aalajangiiffigisassaattut siunnersuut, taamaalilluni kilisaatit umiarsuarimi namminneq tunisassiorsinnaasut, basis-liniemiit 3 sømillit iluanni aalisarsinnaatitaannginnisaat atuutitertinneqartussanngorlugu.

(Inatsisartunut ilaasorta q Siverth K. Heilmann Atassut)

Taamatut siunnersuuteqarneq Siumumiit tunngaviusumik ilalerlutigu matumuuna nalunaarutigaarput.

Siunnersuut tunngaveqarpoq sinerissap qanittuani raajarniarnerup oqimaaqatigiikkunnaarsimasup aammalu tunisassiorfiit pilersorneqarnerisa ataavarnerusumik ingerlanissaannik aallaaveqarluni.

Siunnersuummi pineqarput kilisaatit basis-linieq iluani marlunnik qalorsualerlutik kalittartut 30 meterinik annerusut taakkualu basis-linie-mit avammut anillatsinneqarnissaat, taamaalilluni tamaani peqassuseq annertuumik illersorneqalissammat, aalisarfiullu siunissaq ungasinnerusoq isigalugu inuutissarsiummik ingerlatsiffiujuarnissaa qulakkeerneqassalluni.

Siumumiit matumuuna aalajangiiffigisassatut siunnersuutip qulequtaata imannak allangortinneqarnissaa siunnersuutigissuarput:

”Imartani Kalaallit Nunaata aalisarnikkut oqartussaaffigisaani raajarniarneq pillugu Namminersornerullutik Oqartussat nalunaarutaata nr. 23, 29. august 2002-imeersup allangortinneqarnissaanut Naalakkersuisut peqquneqarnissaannik Inatsisartut aalajangiiffigisassaattut siunnersuut, taamaalilluni kilisaatit 30 meterinik anginerusut basis-linieq iluani aalisarsinnaatitaannginnissaat atuutitinneqartussanngorlugu.”

Taamannak siunnersuuteqarpugut angallatit 30 meterinik anginerusut basis-linieq iluani aalisarsinnaatitaannginnissaat pingaartikkatsigu.

Ukiunimi kingullerni arlaqalersuni malunnarsiertorsimammat sinerissap qanittuani raajarniarneq qangatut pisaqarfiujunnaarsimasoq, imartap pineqartup kilisaatinik eqiteruffiuallalernera tamatumani pissutaalluni, aammalu raajat pinngorartut sinnerlugit qalorneqalernerat aarlerinartutut isigigatsigu.

Kiisalu ilanngullugu Siumumit oqaatigissuarput, saarlisaartut qangatasut immallu naqqanut tunnganngitsut atungaalereersullu assut soqutiginarlutut isigigatsigit, piffimmilu taaneqartumi kilisannermi atussallugit naleqqullutik.

Naggataatigut Siumumit oqaatigissuarput siunnersuuteqartoq tamakkiisumik taperseratsigu, pissutigalugu sinerissap qanittuani aalisarnerup siunissaq ungasinnerusoq eqqarsaatigalugu oqimaaqatigiinnerusumik atuisoqalissammat, minnerunngitsumillu aalisartunut toqqissisimanarnerusussaalluni.

Taamatut oqaaseqarluta siunnersuut Aalisarnermut Piniarnermut Nunalerinermullu Ataasimiititaliamut ingerlatinneqassasoq Siumumiit innersuupparput.